

玉陽王先生可贈玉陽體玄廣度真人

廣甯先生郝大通可贈廣甯通玄太古真人

清淨散人孫不二可贈清淨淵貞順德真人

宜令掌教光先體道誠明真人張志敬執行准此

至元六年正月

碑文

終南山神仙重陽真人全真教祖碑

開府儀同三司上柱國密國公金源璫撰

皇圖啟運必生異人大定隆興道圓賢哲夫三教各有至言妙理釋教得佛之心者達摩也其教名之曰禪儒教傳孔子之家學者子思也其書名之曰中庸道教通五千言之至理不言而

道藏輯要

甘水仙源錄

二

翼集二

傳不行而至若太上老子無爲真常之道者重陽子王真人也其教名之曰全真屏去幻妄獨全其真者神仙也真人名詰字知明應現於咸陽大魏村仙母孕二十四月又十八日按二十四氣餘土氣而成真人也真人美鬚髯大目身長六尺餘寸氣豪言辯以此得眾家業豐厚以粟貸貧人惠之者半其濟物之心畧可見矣弱冠修進士舉業籍京兆府學又善武畧聖朝天眷間收復陝西英豪獲用真人於是捐文場應武舉易名德威字世雄其志足可以知還被道氣充餘善根積著天遣文武之進兩無成焉於是慨然入道改今之名字矣會廢齋攝事秦民未附歲又饑饉時有羣寇劫真人家財一空其大父訴之統府

大索於鄰里三百餘戶其所亡者金幣頗復得焉又獲賊之渠魁真人勉之曰此乃鄉黨饑荒譬如乞諸其鄰者亦非真盜也安忍陷於死地縱捨使去里人以此敬仰真人愈甚咸陽醴泉二邑賴真人得安是後於終南劉蔣村別業居之置家事不問半醉高吟曰昔日龐居士如今王害風於是鄉里見真人曰害風來也真人卽應之蓋因自命而人云正隆己卯季夏旣望於甘河鎮醉中啗肉有兩衣氈者繼至屠肆中其二入形質一同真人驚異從至僻處虔禱作禮其二仙徐而言曰此子可教矣遂授以口訣其後愈狂詠詩曰四句八上始遭逢口訣傳來便有功明年再遇於醴泉邀飲肆中酒家問之鄉貫年姓答曰

道藏輯要

甘水仙源錄

三

翼集二

濮人年二十有二姓則不知也其異歟留歌頌五命真人讀餘火之文載全真集中自此棄妻子攜幼女送姻家曰他家人口我與養大弗議婚禮留之而去又爲詩故以猥賤語詈辱其子孫其末後句云相違地肺成懽樂撞人南京便得真後別號重陽子於南時村作穴室居之名曰活死人墓後遷居劉蔣村北寓水中坻凡肆口而發皆塵外句鄉人唯以害風譁而未始詢其意遇遊則挈一壺行歌且飲有乞飲者亦不拒或以壺取水與人但覺其釀香冽異常後復遇至人飲以神糞因止酒唯飲水焉人聞真人口鼻間醺酣之氣而已醉矣大定丁亥四月忽自焚其庵村民驚救見真人狂舞於火邊其歌語傳中具載又

云三年之後別有人來修此庵口占詩有修庵人來比我風流之句凌晨東邁過關攜鐵罐一枚隨路乞化而言曰我東方有緣爾七月至山東甯海州郡豪有馬從義者先夢南園仙鶴飛翥俄頃真人至馬公信猶未篤真人於鶴起處築全真庵鎖門百日化之或食或不食又絕水火庵至馬宅幾百步復隔重街馬公寢於宅中樓上門戶扃閉真人遇夜親對談論不知從何而來人欲寫其神左目右轉右目左轉或現老少肥瘠黃朱青白形色無定人不能狀之馬夢母曰有一客呂馬通未嘗語人次日真人訓馬公名曰通有馬復夢有梓匠周生者傳道與馬卽辭乃尊有關中之行披席出家見一道士入族人馬戶曹邸

道藏輯要

甘水仙源錄

四

翼集二  
文三上

馬亦隨入見真人與道人對坐有馬九官人者求術於二老真人目公曰教馬哥代我於是馬公誦歌一首約二百餘字夢覺唯記歌尾三兩句云燒得白鍊得黃便是長生不死方翌日真人訓馬公法名曰鈺號丹陽子又夢隨真人入山及旦真人便呼馬公曰山侗至於出神人夢感化非一有譚哥者患大瘋疾垂死乞爲弟子真人以滌面餘水賜之盥竟眉鬚儼然如舊頓覺道炁瀟灑訓名處端號長真子又有登州棲霞縣邱哥者幼亡父母未嘗讀書來禮真人使掌文翰自後日記千餘字亦善吟詠訓名處機號長春子者是也後願禮師者雲集真人誚罵捶楚以磨鍊之往往散去得真人道者馬譚邱而已八年三月

鑿洞於崑崙山於嶺上採石爲用不意有巨石飛落人皆悚慄  
真人振威大喝其石屹然而止山間樵蘇者懼呼作禮遠近服  
其神變又或餐瓦石或現二首坐庵中人見遊於肆或留之飯  
預言來餽者何神通應物不可概舉至八月間遷居文登姜氏  
庵在張氏家食童子輩見目前琉璃瑪瑙珍珠眾寶競來乞取  
餘人則不能見於文登建三教七寶會九年己丑四月甯海周  
伯通者邀真人住庵榜曰金蓮堂夜有神光照耀如晝人以爲  
火災近之見真人行光明中甯海水至鹹鹵真人呪庵之井至  
今人享其甘潔於是就庵建三教金蓮會至福山縣又立三教  
三光會至登州遊蓬萊閣下觀海忽發颶風人見真人隨風吹

道藏輯要

甘水仙源錄

五

翼集二

入海中驚訝間有傾復躍出唯遺失簪冠而已移時卻見逐水  
波汎汎而出或言真人目秀者卽示以病眸或誇真人無漏者  
卽於州衙前登溷凡爲變異人不可測者皆此類也在登州建  
三教玉華會至萊州起三教平等會凡立會必以三教名之者  
厥有旨哉真人者蓋子思達摩之徒歟足見其冲虛明妙靜寂  
圓融不獨居一教也萊人從之者眾獨納劉處立者號長生子  
有釣罷將歸又見鰲之什此四子者世所謂邱劉譚馬也又於  
甯海塗中真人擲油傘於空傘乘風而起至查山王處一庵其  
傘始墜至擲處已二百餘里也其傘柄內有翁陽子號王自髻  
鬣間嘗過玄庭宮主空中警化今呼云玉陽子是也與甯海州

署相對有卜隱郝生驚肆真人倒坐於其間郝曰請真人回頭  
真人曰爾不同頭拂袖而去郝亦隨悟乃廣甯郝大通也馬公  
之妻孫不二者亦同入道早明心地世云孫仙姑者四哲之亞  
真人門人又有此三大士矣真人一日告眾曰時將至矣明日  
西行道友乞詩詞自旦至夜留詩曰登途上路不由吾雲霧相  
招本性甦萬里清風常作伴一輪明月每爲徒山青水綠程程  
送酒白梁黃旋旋沽今夜一杯如有意放開紅燭照冰壺筆尙  
未投從外有史公者來送酒一座大驚真人勸人誦般若心經  
道德清靜經及孝經云可以修證明日牽馬公等四人徑入大  
梁於瓷器王家旅邸中宿止時遇歲除與眾別曰我將歸矣眾

道藏輯要

甘水仙源錄

六

真集二

乞留頌真人曰我於長安樂村呂道人庵壁上書矣枕左肱而  
逝眾皆號慟真人復起曰何哭乎於是呼馬公附耳密語使向  
關中化人入道至十年庚寅正月四日口授頌曰地肺重陽子  
呼名王害風來時長日月去後任西東作伴雲和水爲鄰虛與  
空一靈真性在不與眾人同頌畢儼然而終是後馬公傳道四  
海大行伏遇世宗皇帝知真人道德高明二十八年戊申二月  
遣使訪其門人應命者邱與王也命邱主萬春節醮事職高功  
五月見於壽安宮長松島講論至道聖情大悅命居於官庵又  
命塑純陽重陽丹陽三師像於官庵正位邱累進詩曲其辭備  
載磻溪集中八月懇辭還山至承安丁巳六月章宗再詔王處

一至闕下特賜號體玄大師及賜修貞觀一所十月召劉處玄  
至命待詔天長觀自重陽丹陽長春暨諸師皆有文集傳於世  
嗚呼真人起西州化行山東道滿於天下名聞天子開發後人  
使盡逍遙之遊豈不偉歎後真人五十六年嗣法孫汴京嘉祥  
觀提點真常子李志源中太一宮提點洞真子于善慶二大士  
真實道行弘揚祖道者也懇懇求記於玉陽子友人樗軒居士  
居士援筆爲之銘曰咸陽之屬曰大魏村山川溫麗實生異人  
幼之發秀長而不羣工乎談笑妙於斯文又善騎射健勇絕倫  
以文非時復意於武戡定禍亂志欲斯舉文武二進天不我與  
蓋公宿緣道氣爲主慨然入道真仙自遇頃刻授之口訣祕語  
人呼害風真人承當或歌或舞以酒徜徉維摩非病接輿非狂  
肆口而發皆成文章燒卻庵舍拂袖關中乞化而往全真道東  
甯海因緣萊陽通融亟顯神異東人畢從淘汰真實杜絕虛假  
鍛鍊百端捶楚怒罵餘鄙解散四子傳化四子爲誰邱劉譚馬  
德其亞者王郝與孫共成七賢贊我真人玉陽長春大啟其門  
遭遇聖朝爲王之賓真人高躅望若星雲瀛海渺然仙跡宛存  
此道大行逍遙乎真

終南山重陽祖師仙跡記

翰林修撰嘉議大夫同知制誥上輕車都尉彭城郡  
開國伯食邑七百戶賜紫金魚袋劉祖謙撰

道藏輯要

甘水仙源錄

七

翼集二  
X6011